

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ODLUKA

**O PRIHVATANJU ZADUŽENJA PO UGOVORU O ZAJMU IZMEĐU BOSNE I
HERCEGOVINE I EVROPSKE BANKE ZA OBNOVU I RAZVOJ ZA REALIZACIJU
PROJEKTA POBOLJŠANJE ENERGETSKE EFIKASNOSTI U JU
KANTONALNOJ BOLNICI ZENICA**

Sarajevo, juli 2018. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16) Predstavnički dom Parlamenta Federacije Bosne i Hercegovine na _____ sjednici održanoj _____ i Dom naroda Parlamenta Federacije Bosne i Hercegovine na _____ sjednici održanoj _____ d o n o s i

ODLUKU

O PRIHVATANJU ZADUŽENJA PO UGOVORU O ZAJMU IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ ZA REALIZACIJU PROJEKTA POBOLJŠANJE ENERGETSKE EFIKASNOSTI U JU KANTONALNOJ BOLNICI ZENICA

I.

Prihvata se zaduženje Federacije Bosne i Hercegovine (u daljem tekstu: Federacija BiH) po Ugovoru o zajmu između Evropske banke za obnovu i razvoj (u daljem tekstu: Banka) i Bosne i Hercegovine (u daljem tekstu: BiH) za realizaciju Projekta poboljšanje energetske efikasnosti u JU Kantonalnoj bolnici Zenica od 10.000.000,00 EUR.

II.

Sredstva zajma iz tačke I. ove Odluke koristit će se za realizaciju Projekta poboljšanje energetske efikasnosti u JU Kantonalnoj bolnici Zenica (u daljem tekstu: Projekat). Osnovni cilj i svrha Projekta je izgradnja novog termoenergetskog bloka, mašinske instalacije i utopljanje objekata JU Kantonalne bolnice Zenica.

III.

Sredstva zajma iz tačke I. ove Odluke, odobravaju se Federaciji BiH pod sljedećim uslovima:

- iznos zajma:.....10.000.000,00 EUR-a
- rok otplate:.....12 godina
- grace period:.....3 godine
- kamatna stopa:.....šestomjesečni EURIBOR plus marža 1% godišnje
- jednokratna provizija:.....1 % na iznos glavnice zajma
- dospjeća:.....polugodišnje u jednakim otplatama glavnice
- provizija na nepovučeni iznos zajma:.....0,5 % godišnje

IV.

Potvrđuje se da je razmatrana dokumentacija prihvatljiva za Federaciju, a posebno:

- Nacrt Ugovora o zajmu između Banke i BiH;
- Zapisnik sa pregovora.

V.

Sredstva zajma iz tačke I. ove Odluke Federacija BiH će prenijeti na Zeničko-dobojski kanton potpisivanjem Podugovora o zajmu između Federacije BiH i Zeničko-dobojskog kantona. Zeničko-dobojski kanton će zaključivanjem odgovarajućeg Podugovora o zajmu prenijeti zajam na JU Kantonalnu bolnicu Zenica, kao krajnjem dužniku i korisniku zajma.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija - Federalno ministarstvo financija da sa Zeničko-dobojskim kantom usaglasi i sklopi odgovarajući Podugovor o zajmu kojim će, u svrhu redovne otplate, definirati uslovi vraćanja sredstava koja se prenose po osnovu zajma iz tačke I. ove Odluke.

VII.

Daje se saglasnost za zaključivanje Supsidijarnog sporazuma između BiH i Federacije BiH, kao i saglasnost za zaključivanje i usaglašavanje odgovarajućeg Podugovora o zajmu između Federacije BiH i Zeničko-dobojskog kantona, za sredstva zajma iz tačke I. ove Odluke.

Za potpisivanje Supsidijarnog sporazuma i Podugovora o zajmu, ovlašćuje se federalni ministar finansija – federalni ministar financija.

VIII.

Za realizaciju ove Odluke i izvještavanje zadužuju se Federalno ministarstvo finansija – Federalno ministarstvo financija i Zeničko-dobojski kanton, svako u okviru svoje nadležnosti.

IX.

Implementacija Sporazuma iz tačke I. ove Odluke ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE

Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrta kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Donošenjem ove Odluke stvara se osnov za potpisivanje Supsidijarnog sporazuma između BiH i Federacije BiH, a potom i Podugovora o zajmu između Federacije BiH i Zeničko-dobojskog kantona, na osnovu kojeg će Federacija BiH sredstva zajma proslijediti JU Kantonalnoj bolnici Zenica kao krajnjem dužniku i korisniku zajma predmetnog Projekta.

Sredstva zajma koristit će se za finansiranje Projekta poboljšanje energetske efikasnosti u JU Kantonalnoj bolnici Zenica. Osnovni cilj i svrha Projekta je izgradnja novog termoenergetskog bloka, mašinske instalacije i utopljanje objekata JU Kantonalne bolnice Zenica.

Obrazloženje pojedinih tačaka

Tačka I. je nužna kako bi se prihvatilo zaduženje Federacije BiH kod Banke.

Tačkom II. potvrđuje se namjena utroška sredstava zajma.

Tačkom III. precizirani su uslovi zajma.

Tačkom IV. potvrđuje se da je dokumentacija parafirana tokom pregovora s Bankom prihvatljiva za Federaciju BiH, što je uslov da BiH i Banka pristupe potpisivanju Ugovoru o Zajmu.

Tačkom V. se definira način implementacije Projekta, te da nije potrebno osigurati dodatna sredstva u Budžetu Federacije BiH za ovu namjenu.

Tačkom VI. se definira obaveza Federalnog ministarstva finansija da sa Zeničko-dobojskim kantonom usaglasi i sklopi odgovarajući Podugovor o zajmu.

Tačkom VII. daje se saglasnost za zaključivanje Supsidijarnog sporazuma s BiH, Podugovora o zajmu između Federacije BiH sa Zeničko-dobojskim kantonom i ovlaštenje federalnom ministru finansija da u ime Federacije BiH potpiše iste.

Tačkom VIII. u okvirima nadležnosti definira se obaveza za realizaciju Odluke i izvještavanje.

Tačkom IX. se potvrđuje da za implementaciju Ugovora o zajmu nije potrebno donijeti nove ili izmijeniti postojeće zakone.

Tačka X. propisuje stupanje na snagu ove Odluke.